

修訂日期: 2004/10/22 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 21, No. 1380

原始資料: 蕭鎮國大德提供, 北美某大德提供

## No. 1380

### 佛說善樂長者經

西天譯經三藏朝奉大夫試光祿卿明教大師臣法賢奉 詔譯

如是我聞。一時佛在迦毘羅城。與大眾俱。是時有一釋種長者。名曰善樂住在本處。而彼長者信重三寶。歸依佛歸依法歸依僧。唯信佛法僧不復信於諸餘外道。唯求佛法僧善解苦集滅道。見真實理獲大果報。而當非大即證菩提。時彼長者於所見色忽然不見。

爾時善樂長者遙向世尊作是願言。我佛世尊大慈大悲。願施我眼目施我眼光明施我眼清淨除我眼昏暗。發是願已又作是言。我今歸依佛歸依善逝。

爾時世尊以清淨天耳過於人耳。遙聞彼長者發願言已。即告尊者阿難言。阿難汝今持我祕密神呪。往彼釋種善樂長者處。與作救拔護持令得寂靜安樂。乃至與彼四眾亦作利益安樂故。

爾時世尊為善樂長者等。說此清淨眼祕密大神呪曰 怛[寧\*也](切身下同)他(引一)呬里彌里企里(二)呬係(引)多(三)忽喻忽喻(四)忽夜(引)尾底(五)忽盧忽盧忽盧(六)訥訥訥訥盧(七)以此清淨眼祕密神呪句力。眼得清淨除去昏暗除去翳障。乃至除去風毒眼病黃毒眼病。痰毒眼病癩毒眼病。無痛無腫無惱無苦無諸眵淚。如是等病皆悉消除。復以戒真實力修行真實力苦。行真實力祕密神呪真實力緣生法真實力。苦法真實力集法真實力。滅法真實力道法真實力。須陀洹真實力斯陀含真實力。阿那含真實力阿羅漢真實力。緣覺真實力菩薩真實力。佛真實力法真實力聖眾真實力。以如是等真實力故。眼得清淨除去昏暗除去翳障。所有風毒眼病黃毒眼病。痰毒眼病癩毒眼病。皆不能侵。無痛無腫無惱無苦無諸眵淚等。

佛告阿難此祕密神呪。是過去六正等正覺同共宣說。所謂尾鉢尸如來正等正覺。室棄如來正等正覺。尾說部如來正等正覺。訖囉葛忒陀如來正等正覺。葛那葛牟尼如來正等正覺。迦葉波如來正等正覺。我今第七釋迦牟尼如來正等正覺亦如是說。乃至四大天王。謂持國天王增長天王。廣目天王多聞天王。及帝釋天主娑婆界主大梵天王等。皆亦隨喜宣說。

佛告阿難。我未見彼天界梵界及諸魔界。乃至沙門婆羅門等界。若有人持誦此祕密大神呪三遍者。有諸病苦而能侵害。所有昏暗內外翳障等。乃至天所作病龍所作病。夜叉所作病阿脩羅所作病。迦樓羅所作病乾闥婆所作病。鳩槃荼所作病必隸多所作病。富單那所作病羯吒富單那所作病。毘舍左所作病羅刹所作病。羯枯陀所作病[口

\*大]多拏所作病。星曜所持乃至中毒。及諸邪呪法等悉皆消除。又復阿難如是祕密大神呪法。若有患者日念三遍。是人眼得清淨如前見物此。如是清淨眼祕密大神呪有大力故。眼得如是清淨。除去昏暗及內外醫障。乃至風毒障黃毒障痰毒障。痰毒障等皆悉消除。無痛無苦無諸眵淚。又復清淨戒真實力修行真實力。五通仙真實力賢聖真實力聖藥真實力。祕密句真實力緣生法真實力。苦法真實力集法真實力。滅法真實力道法真實力。須陀洹真實力斯陀含真實力。阿那含真實力阿羅漢真實力。緣覺真實力菩薩真實力佛真實力。以如是等真實力故。眼得清淨。

爾時世尊復說祕密神呪曰。

那謨(引)沒馱寫(一句)婆譏嚙都(引)悉殿靚滿怛囉(二合)鉢那莎(引)賀(二)

佛告阿難此祕密大神呪。若人日日三時。與前神呪同共依法誦念。是人所有眼病悉皆消除。

爾時尊者阿難白佛言世尊。我今承佛聖旨持此祕密大神呪。往彼善樂長者處廣為宣說。與彼善樂長者及四眾等作大利益。佛說是經已尊者阿難及諸大眾。聞佛所說皆大歡喜信受奉行。

**佛說善樂長者經**